

Minister di Labor Paul Croes

Ningun momento gobierno a bay den negociacion cu Sr. Rincon

ORANJESTAD – Oposicion a haci uzo di e situacion cu ta reina rond di e aresto di Rincon na Merca pa muestra cu Gobierno di Aruba ta basta meti den e asunto scur rond di Rincon. Lider di fraccion Sra. Evelyn Wever-Croes a hasta indica cu Sr. Rincon ta esun cu a paga pa gobierno por biahá y atende reunionnan. Minister Paul Croes ta sali na defensa di gobierno y ta indica cu esaki no ta e caso.

Minister Croes ta haya cu loka lider di fraccion ta bisa ta un ridiculidad di marca mayor. El a sigui indica cu gobierno di Aruba semper a tene negociacionnan directamente cu e compania CITGO. Den e negociacionnan aki y esfuerso nan pa yega na un reapertura, tabata tin varios contacto internacional, local cu a haci esfuerso grandi pa realisa esaki. E mandatario kiermen nan no ta nenga esaki.

Naturalmente den tur negociacion tin esunnan cu ta hunga rol importante. E ta confirma cu den e reunionnan aki, tabata tin reunionnan apart cu Sr. Rincon. Pero ningun momento gobierno di Aruba a bay den negociacion of tin algo di sconde tras di locual ta sosodiendo. Ta asina aki cu na e momentonan aki tin un investigacion internacional sosodiendo. Sr. Rincon ta un persona cu tabata tin diferente compania na diferente pais rond di mundo, y cu e ta den e caso



aki ta keda na nan pa averigua esaki. Naturalmente segun e proceduranan y conseho di minister, na momento cu e situacion aki a sali di biaha ta wordo atendi.

Posibel reapertura

Ora di biaha nan ta haya placa di compensacion pa dia, e ticketnan ta wordo paga y tur esaki gobierno di Aruba ta percura pa nan, segun e mandatario. Ta importante pa menciona cu gobierno ta mira den henter e situacion aki, den henter e insinuacionnan cu a bin dilanti ta trata na crea un ambiente negativo rond di un reapertura asina positivo pa Aruba.

E aña 2015 a cera cu un anuncio asina importante pa pais Aruba y no pa gabinete Mike Eman, pa minister Mike de Meza of e otro ministernan den e gobierno aki. “Pero nos pais a haya e anuncio importante y positivo cu pa aña 2016 nos ta bay mira un posibel reapertura y un impacto economico adicional di 15%

pa nos pais,” e mandatario a indica.

Baha cifra di desempleo
E impacto aki lo baha e cifra di desempleo cu 2 porciento



cu asina por bisa cu esunnan local cu pa hopi aña a labora den e refineria, ta haya e oportunidad pa bay bek den esaki. Arubianonan cu ta operando na e momentonan aki na Saudi Arabia, na Trinidad, na Dubai y otro parti di mundo cu tin anhelo pa bin bek na nan isla, ta mira un biaha mas e oportunidad pa bin y por aporta un biaha mas na e

progreso di nan pais. Tur esakinan ta noticianan cu naturalmente ta haci oposicion hopi dolor, segun Minister Croes.

Primeramente un refineria no ta wordo habri door di saca potret cu hendenan y pone esakinan riba facebook, e mandatario a bisa. Esey no ta e forma cu ta habri e refineria. Na momento di haci negociacionnan, contactonan, reunionnan intensivo, pensa tambe den ki forma esaki ta wordo realisa, pensa tambe den ki tipo di acuerdonan fiscal ta yega, ki tipo di operacion lo bay tuma luga, cuanto cupo di trabou esaki ta genera pa bo pais, cuanto

ministernan a pone nan puntonan como Aruba cu cierto condicionnan pa e reapertura di e refineria. Pero pa motibo di e noticia grato aki, pa motibo di e animo cu ta bibando den sociedad di Aruba, naturalmente oposicion tin cu sali for di unda cu ta y purba di pone un luz negativo riba un desaroyo asina importante pa e pais aki.

Lubidando na treciendo e tipo di cosnan aki pa dilanti, ta purba di bagatela un impacto enorme cu esaki lo tin pa Aruba. Lamentablemente e mensahenan di gobierno ta cu e apertura, e reapertura di e refineria aki hamas por wordo kita for di e record di e gabinete di Mike Eman II, segun Minister Croes. Esfuerso nan grandi di Mike de Meza añaan prome cu nan por a anuncia e reapertura di e refineria ta echonan. Echonan historico unda cu pueblo por mira atrobe un reapertura y e grato noticia ta cu tin techniconan specialisa na Aruba ainda den negociacion, ainda ta haciendo e preparacion economico y tecnico pa asina gobierno por finalisa e acuerdo definitivo y bay over na e reapertura. “Naturalmente e echonan aki ta haci nos oponentenan dolor, ta haci esunnan tambe cu ta contra di un reapertura di refineria hopi dolor y pa tal motibo ta trece insinuacionnan cu no tin base, hasta absurdo pa asina bagatela e importancia di e logro historico aki di gabinete Mike Eman II,” e mandatario a indica. □